

四庫全書

子部

欽定四庫全書

子部
說郛卷六十一
上
下

詳校官庶吉士_臣陳若霖

員外郎_臣牛稔文覆勘

總校官編修_臣倉聖脉

校對官檢討_臣蕭九成

謄錄監生_臣魏世鵠

欽定四庫全書

說郛卷六十一上

元 陶宗儀 撰

三秦記 辛氏

山陵

秦名天子冢曰長山漢曰陵故通名山陵

地市

驪山始皇陵作地市生死人交易市平不得欺死人云

秦王地市有斷馬利

太白山

太白山不知高幾許俗云武功太白去天三百山下軍行不得鳴鼓角鳴鼓角則疾風暴雨兼至也

隴坂

隴西關其阪九迴不知高幾里欲上者七日乃越高處可容百餘家下處數十萬戶其上有清水四注俗歌曰隴頭流水鳴聲幽咽遙望秦川肝腸斷絕去長安千里望秦川如帶關中人上隴者還望故鄉悲思而歌則有

絕死者

沙角

河西有沙角山峰崿危峻逾於石山其沙粒麤色黃有如乾糲又山之陽有一泉云是沙井綿歷今古沙不填足人欲登峰必步下入穴即有鼓角之音震動人足

溫泉

驪山湯泉舊說以牲祭乃得入可以去疾消病俗云秦始皇與神女遊而忤其旨神女唾之則生瘡始皇怖謝

神女為出溫泉而洗除後人因以為驗

蘭池

秦始皇作蘭池引渭水東西二百里南北二十里築土為蓬萊山刻石為鯨魚長二百丈

城赤色

長安城中地皆黑壤今城赤何也且堅如石如金父老相傳云蓋鑿龍首山中土以為城及諸城闕亦然

織錦城

梁山宮在好畤城皆文石名織錦城

未央

未央一名紫微宮

桂宮

未央宮漸臺西有桂宮中有明光殿皆金玉珠璣為簾箔綴明月珠金砌玉階晝夜光明

豹林谷

在子午谷

鳳闕

柏梁臺有銅鳳因名鳳闕

韋曲

在皇子陂之西

杜門

即青門

子午

子午長安正南山名

始平

長安城北有始平原數百里無山川湖水其民井汲巢居井深五十丈有伯夷墓人採薇可常食或云夷齊食三年顏色如故

白鹿

周平王東遷有白鹿遊於此原以是得名蓋秦運之象

桃林

桃林塞在長安東四百里若有軍馬經過好行則牧華

山休息林下惡行則決河漫延人馬不得過矣

長安志

宋敏求

結麟樓七聖紀曰鬱華赤文與日同居結麟黃文與月同居鬱華日精結麟月精又太上黃庭內景玉經曰高奔日月吾上道鬱儀結麟善相保梁丘子注曰鬱儀奔日之仙結麟奔月之仙六典作結鱗未知從何字

驪山在縣東南二里驪戎來居此山按土地記曰即藍田山也天寶元年更驪山曰會昌山七載又改曰昭應山

公泉為陂十道志曰有五漢陂陂魚甚美因誤名之唐
寶歷二年勅漢陂令尚食使收管不得雜人採捕其水
任百姓灌溉勿令廢碾磴之用文宗初詔並還府縣
大明宮高宗命司農少卿梁孝仁制造北據高原南望
輿塏每天晴日朗南望終南山如指掌京城坊市街陌
俯視在檻內

隋煬帝在藩舊宅武德中賜尚書左僕射蕭瑀西為少
陵原南接終南北至漚水即漢鴻固原也宣帝許后葬

於此俗號少陵原

韋嗣立營構別業于驪山鳳凰原鸚鵡谷有重崖洞壑
飛流瀑水中宗親往幸焉因封嗣立逍遙公名其園後
瑀子銳尚襄城公主詔別營主第主辭以姑婦異居有
乖禮則因固陳請乃取園地充主第又辭公主榮戟不
欲異門乃併施瑀之院門

關中記

潘岳

長安地皆黑壤城今赤如火堅如石父老所傳蓋鑿龍首山土為城又諸臺闕亦爾

終南山一名中南言在天中居都之南故關中曰南山昆明池曰神池靈沼堯治水訖停舟此池蓋堯已有池漢代因而深廣之

涇與渭洛為關中三川與渭灞滻澇潏澧高為關中八水

未央宮周旋三十三里街道十七里有臺三十二池十二土山四宮殿門八十一掖門十四宮殿及臺皆疏龍首山土以作之殿基出長安城上非築也

未央宮東有鴛鴦殿

宣帝少依許氏長於杜縣樂之後葬於南原立廟於曲池之北亭曰樂遊原

龍首山首枕渭之南岸尾達樊川首高尾下在長安城南

漢築長安城及營宮殿咸以堙平至今坊市北據高原
南望爽塏視終南如指掌

欽定四庫全書

卷六十一上

洛陽記

陸機

洛陽城周公所制東西十里南北十三里城上百步有一樓櫓外有溝渠

洛陽城內西北角有金墉城東北角有樓高百尺魏文帝造也

雲臺高閣十四間乘風觀閣十二間

洛陽南宮有乘風觀北宮有增喜觀城外有宣陽觀千秋鴻地泉城揚威石樓鼎中等觀

宮中有臨高陵雲宣曲廣望閭風萬世修齡總章聽訟
凡九觀皆高十六七丈雲母窓日曜之有光

三市大市名也金市在大城西南市在大城南馬市在
大城東按金市名商觀西兌為金故曰金市

銅駝街在洛陽宮南金馬門外人物繁盛俗語云金馬
門外聚羣賢銅駝街上集少年

漢洛陽四關東成臯關南伊闕關西函谷關北孟津關
城南五十里有大谷舊名通谷

紫微宮有一柱觀

[illegible]

梁州記 劉澄之

武侯壘

武侯壘東南有定軍山八十餘里有諸葛武侯墓鍾會
征蜀至漢州祭亮之墓令軍士不得於墓芻牧樵采今
松柏碑銘儼然

白水關

關城西南百八十里有白水關李固解印綬處也

溫泉

漢水南有溫泉周圍數千步冬夏常沸涌若湯其熱可
熟雞子

盟壇

沔陽城在漢水南舊蕭何所築也劉備為漢王權住此
城盟於城下今門外有盟壇猶存

諸葛井

諸葛亮宅有井深四尺餘口廣一尺五寸累塼如初開
云

雁塞

梁州縣界有鴈塞山傳云此山有大池水鴈棲集之故
因名曰鴈塞

梁京寺記

闕名

小莊嚴寺

梁小莊嚴寺在建業定陰里本是晉零陵王廟地天監
六年度禪師起造時有邵文立者世以烹屠為業嘗欲
殺一鹿鹿跪而流淚以為不祥鹿懷一魔尋當產育就
庖哀切同被剝割因斯患疾眉鬚皆落身瘡並壞後乃
深起悔責求道度禪師發大誓願罄捨家資迴買此地
為立伽藍

同泰寺

梁武帝改年號大同起同泰寺在臺城內窮竭帑藏造大佛閣七層為火所焚武帝捨身施財以祈佛福自大通以後無年不幸

興國禪寺

梁武帝天監十三年以錢二十萬易定林前前岡獨龍阜以葬誌公永定公主以湯沐之資造浮圖五級於其上十四年即塔前建開善寺

昇元寺

昇元寺即瓦棺寺也在城西隅瞰江面後踞崇岡最為古跡累經兵火畧無彷彿李王時昇元閣猶在乃梁朝故物

大愛敬寺

梁武帝普通元年造在蔣山之北高峰上

法寶寺

梁同泰寺基之半也建康剎錄梁武帝大通元年創同

泰寺寺處宮後別開一門名大通門帝晨夕講議多由
此門

法光寺

即梁之蕭帝寺舊傳天監十三年造元絳寺記云不知
從昔之名故後人以帝寺目之

寶林寺

梁天監中武帝與寶公同遊此山見林巒殊勝命建精

藍

長干寺

建康南五里有山岡其間平地庶民雜居有大長干小長干東長干並是地名小長干在瓦棺寺南巷西頭出大江梁初起長干寺

--	--	--	--	--	--	--	--

宜都記 袁崧

猥山縣有溫泉注大溪夏纔煖冬則大熱常有霧氣百病久疾入此多愈

獸牙山有石壁其文黃赤色有牙齒形

猥山縣東六十里有山名下魚城四面絕崖唯兩道可上皆險絕上周迴可二十里有林木池水人田種於山上昔永嘉亂土人登此避賊守之經年食盡取池魚擲下與賊以示不窮賊遂退散因此名為下魚城

峽中猿鳴至清山谷傳其響泠泠不絕行者歌之曰巴東三峽猿鳴悲猿鳴三聲淚沾衣

自西陵泝江西北行三十里入峽山行周廻隱映如絕復通高山重嶂非日中夜半不見日月也

西陵江南岼有山孤秀從江中仰望壁立峻絕人自山南上至其嶺嶺容十許人四面望諸山畧盡其勢俯臨大江如縈帶焉視舟船如鳬鴈矣

宜都山絕崖壁立數百丈有一大燼插其崖間望可長

數尺傳云堯洪水人泊船此旁繫餘故曰插竈涯也

益州記

任豫

劍西左擔道按圖在陰平縣北於成都為西注曰其道至險自北來者擔在左肩不得度右肩也

姜維抗鍾會故壘其山峭壁千丈下臨絕澗

雁橋東君平賣卜土臺局高數丈

魚蛇水東北自陵州界入青神縣界

龍盤山有一石長四十丈高五丈中有戶及扉若人掩

閉古老相傳為玉女房

益州城張儀所築錦城在州南蜀時故宮也其處號錦里

江油左擔道按圖在陰平縣北於成都為西其道至險自北來者擔在左肩不得度右肩也鄧艾東馬懸車之處葭萌縣十里有刀鐮山赤銅水出焉

金山東臨澗水光照映川

東隅西隅南隅三山相對又曰三隅山去陵井一里也五城縣西南六十里有銅官山高出衆峰

南充縣西南六十里有昆井鹽井又曰雞郵神在相如縣東次北下步有雞郵溪因此而為之名

伏犀灘東南六十里有黃魚像岬今在犍道縣界又曰龍騰溪水源出南溪縣

黃葛峽有相思崖芳泉周灌俗謂之神窟

司馬相如宅在州西笮橋北百許步李膺云市橋西二百步得相如舊宅今梅安寺南有琴臺故墟

--	--	--	--	--	--	--	--

荊州記 盛弘之

衡山有三峰極秀一峰名芙蓉峰最為竦桀自非清霽
素朝不可望見峰上有泉飛派如一幅絹分映青林直
注山下

巴陵南有青草湖周迴百里日月出沒其中湖南有青
草山故因為名

宜都西陵峽中有黃牛山江湍紆迴途經信宿猶望見
之行者語曰朝發黃牛暮宿黃牛三朝三暮黃牛如故

綠城邊隄悉植細柳綠條散風青陰交陌

雁塞北接陽州汶陽郡其間東西嶺屬天無際雁飛翥
至此即回翼唯一處稍下每雁飛達則矯翼裁度下處
而過故名雁塞

武陵舞陽縣有石帆山若數百幅帆

隨郡北界有九井相傳神農既育九井自穿又云浚一
井則衆井水皆動

巴東有一折柱孤直高三丈大十圍傳云是公孫述樓

柱破之血出枯而不朽

湖陽縣春秋蓼國樊重之邑也重母畏雷為石室避之
悉以文石為堦砌今猶存

恨山縣有一山獨立峻絕西北有石穴以獨行百步許
二大石其門相去一丈許俗名其一為陽石一為陰石
水旱為災鞭陽石則雨鞭陰石則晴

湘東有雨母山山有祠壇每祈禱無不降澤以是名之
耒陽縣有雨瀨此縣時旱百姓共壅塞之甘雨普降若

一鄉獨壅雨亦偏降應隨方所其信若符刻

小酉山石穴中有書千卷相傳秦人於此學因留馬故
梁湘東王云訪酉陽之逸典是也

南陽有菊水其源旁悉芳菊水極甘馨又中有三十家
不復穿井即飲此水上壽百二十三十中壽百餘七十
猶以為夭漢司空王暢太傅袁隗為南陽令縣月送三
十餘石飲食澡浴悉用之太尉胡廣父患風羸南陽恒
汲飲此水疾遂瘳此菊短葩大食之甘美異於餘菊廣

又收其實種之京師遂處處傳置之

筑陽縣粉水源出房陵取其水為粉鮮潔異於餘水矣
枝江縣西至上明東及江津其中有九十九洲楚諺曰
洲不滿百故不出王者桓玄有問鼎之志乃增一為兩
以克百數僭號旬時身屠宗滅及其傾覆洲亦消毀至
宋文帝在藩忽生一洲果龍飛江表元兇之禍此洲還
沒

新陽縣惠澤中有溫泉冬月未至數里遙望白氣浮蒸

如烟上下采映壯若綺疏又有車輪雙轅形世傳昔有
玉女乘車自投此泉今人時見女子姿儀光麗往來倏
忽

沌陽縣至沔口水北有却月城西一里有馬騎城周迴
五里高一丈

富陽縣城樓王仲宣登之而作賦

富陽東南七十里有楚昭王墓登樓則見所謂昭丘

郡西沂江六十里南岬有山名曰虎牙二山相對楚之

西塞也荆門上合下開開達山南有門之形故曰荆門
江陵有潛室人時見之輒有兵寇

湘中記羅含

九疑在營道縣與北山相似行者疑惑故名之

衡山近望如陣雲沿湘千里九向九背

衡山九疑皆有舜廟太守至官常遣戶曹致祀則如聞絃歌之聲

湘水至清雖深五六丈見底了了然其石子如桴蒲大五色鮮明白沙如霜雪赤岬若朝霞

營水非水觀水祁水春水永水來水淥水連水瀏水瀉

水汨水資水皆注湘

曲江縣有銀山山常多素霧

屈潭之左玉笥山屈平之放棲於此山而作九歌

宿當軫翼度應機衡故曰衡山山有錦石斐然成文衡
山有懸泉滴瀝崑間聲泠泠如絃有白鶴迴翔其上如
舞

衡陽縣東二十里有鄴湖周二十里深八尺湛然綠色
土人取以釀酒其味醇美

益陽有昭潭其下無底湘水最深處也或謂周昭王南
征不復沒於此潭因以為名

都溪又西北流入營水謂之菁口

郴縣南有義帝廟百姓祭之

丈斤山上有石床方高一丈四面綠竹扶疎常隨風委
拂

臨水經臨賀縣東又南至郡左合賀水

君山有地道楂渚對岬古城孫權遣程普所立

耒陽縣北有蔡倫宅宅西有一石曰云是倫舂紙臼也
祝融峯上有青玉壇方五丈有蓋香峯行道處

武陵記

鮑堅

武山

武山高可萬仞山半有盤瓠石窟中有一石狗形云是盤瓠之遺像又有斑蛇四眼身大十圍山有水出謂之武漢是也在縣之西

黃聞山

昔有臨沅黃道真住黃聞山側釣魚因入桃花源陶潛有桃花源記今山下有潭名黃聞此蓋聞道真所說遂為

其名也

風門山

風門山有石門去地百餘丈每欲風起此門先有黑若烟隱而上斯須風起竟入

石帆山

石帆山危起若數百幅帆形

虎齒山

虎齒山形如虎齒民嘗六月祭之不然輒有虎害

武陵山

武陵山中有秦避世人居之尋水號曰桃花源故陶潛有
桃花源記

漢南記

張瑩

大人

安帝見銅人以問侍中張陵對曰昔秦始皇有大人十二身長五丈履六尺皆麗奇之服見於臨洮此天將亡秦之證而始皇誤喜以為瑞乃鑄銅人以為像上曰何以知之對曰臣見傳載有其人胸上有銘

乘使者車

郭丹絕跡弃軍纏節裏傳從武關出謁更始歎曰不乘

使者車不出關矣

古楚子國

荆華二山絕漢水而南至江西距劍閣盡其地也古楚子國

石堪為硯

江州蔡子池南有石穴深二百許丈石色青堪為書硯漢臯解珮

列仙傳云江妃二女游漢臯見鄭交甫遂解珮與之交

甫受珮而太數十步懷中無珮女亦不見

推車與弟

陰慶為鮦陽侯其弟員及丹皆為郎慶以明尚書修儒術推居第園田奴婢錢悉分與員丹慶但佩印綬而已當代稱之

南雍州記

王韶

太和山

武當山山高巖峻若博山香爐菖亭峻極干霄出霧學
道者常百數相繼不絕若有於此山學者心有隆替輒
為獸所逐

粉水

蕭何夫人漬粉處也

酒泉

福祿城謝艾所築下有金泉味如酒有人飲此泉水見有金色從山中照水往取得金故名

辛居士家

辛居士名宣仲家貧春月鶯筍充腸酌截竹為罌用充盛置人問其故宣仲曰我惟愛竹好酒欲令二物常相並耳

諸葛故宅

隆中諸葛亮故宅有舊井一今涸無水盛弘之記云井

深五丈廣五尺堂前有三間屋地基址極高云是孔明避暑臺宅西山臨水孔明常登之鼓琴以為梁父吟因名此為樂山先有人家居此宅衰殄滅亡後人不敢復憩焉齊建武中有人修井得一石枕高一尺二寸長九寸獻晉安王習鑿齒又為宅銘

樂善臺

高齋之後有堂堂西有射堂五間射堂南有大池池上有臺名曰樂善臺

說邪卷六十一上